
Вилоятимизда наврўз сайллари

РИШТОН

Янгиланиш, яшариш фасли — “Наврўзи олам” риштонликлар қалбига ҳам бир олам қувонч, шу азиз ва мўътабар, буюк ва суюк Ватанга ифтиҳор, тинчликка шукроналик, келажакка катта ишонч билан кириб келди.

Эрта тонгда янграган карнай-сурнай садолари туман халқини Бурҳониддин ал Марғинович ар Рошидоний номидаги боғда ташкил қилинган байрам сайлига чорлади.

“Наврўз” байрами муносабати билан туман ҳокимининг биринчи ўринбосари Содиқжон Ҳайдаров, халқаро Валюта фонди вакили Лоренс Двайт, Ўзбекистон Ёзувчилар уюшмаси аъзоси, шоира Зебохон Мирзаева туман халқини қизғин муборакбод этдилар.

Шу куни Юқори Булоқбоши маҳалла фуқаролар йиғини раиси, туман Кенгаши депутати Тўлқиной Қодирова бошчилигида ўндан ортиқ маҳаллалар маслаҳатчилари томонидан тайёрланган сумалак, туман ҳокими, туман прокурори, туман ички ишлар бўлими ва туман Давлат солиқ инспекцияси бошлиғи раҳбарлигидаги секторлар томонидан тайёрланган ош байрам иштирокчилари учун тортиқ этилди.

Ўзбекистонда хизмат кўрсатган артист Александр Бекжонов, эстрада хонандаси Шоира Отабекова, шунингдек туман маданият бўлимига қарашли “Гулноз” ашула ва рақс ансамблининг хушовоз хонандалари тумандаги 21-сонли мусиқа ва санъат мактаби ҳамда мактабгача таълим муассасаларининг иқтидорли ўқувчилари томонидан ижро этилган куй ва қўшиқлар байрам иштирокчиларининг қалбига бир олам баҳорий қувонч олиб кирди.

Наврўз тантаналари туманнинг барча қишлоқ ва маҳаллаларида, оилаларда давом этмоқда.

БЕШАРИҚ

Туман марказий ўйингоҳи, маданият ва истироҳат боғида эрталабдан бошланган халқ сайли кечга қадар давом этди.

Бир томонда дорбозлик санъати, аскиячиларнинг ҳазил-мутойибалари авжига чиқса, иккинчи томонда баҳорий неъматлар кўргазмаси намоёиш қилинди.

“Оқ терак” фольклор ансамбли, “Ниҳол” мукофоти совриндори Отабек Муталхўжаев ва бошқа пойтахтлик, фарғоналик санъаткорлар ижросидаги қўшиғу яллалар байрамга ўзгача файз бағишлади.

Спортчилар, “Бек” каратэ клуби тарбияланувчиларининг чиқишлари қарсақлар билан олқишланди.

Байрам сайлида ҳар бир маҳалла сумалак сузиб, ноз-неъматларга тўла дастурхонга байрам қатнашчиларини таклиф этди.

– Халқ сайлининг бу қадар халқона ва кўтариуки руҳда ўтганини кўрмаган эдим, – дейди тумандаги “Капаянга” МФЙда истисқомат қилувчи меҳнат фахрийси Охунжон Қамбаров.

ҚУВАСОЙ

Бу йилги “Азиз ватандошлар, ҳар кунингиз Наврўз бўлсин!” деган эзгу ғояни ўзида мужассам этган байрам тадбирлари кўпмиллатли Қувасой халқи учун унутилмас таассуротларга бой бўлди.

Марказдаги “Ёшлар” боғида маҳалла фуқаролар йиғинлари, касб-ҳунар коллежлари, умутаълим мактаблари, мактабгача таълим муассасалари ўзларининг кўргазмалари, миллий ҳунармандчилик намуналари билан қатнашдилар.

Катта дошқозонларда сумалаклар солиниб, элга тортиқ этилди. Халқ сайлида турли миллат вакиллари ўзларининг баҳорий ва миллий таомларидан тайёрладилар.

Байрам тадбирида сўз олганлар барчани Наврўзи олам билан самимий қутлаб, унинг шукуҳи хонадонларни асло тарк этмаслигига тилак билдирдилар.

Боғ марказида таниқли хонандалар ва ёш ижрочиларнинг қўшиқлари барчани рақсга чорлади.

Қувасойда турли миллат вакиллари аҳил-иноқликда яшаб келмоқдамиз, – дейди сайл иштирокчиси, маҳалла фаолларидан бири Замира Мадаминова. – Бугун ҳар бир инсоннинг юзида, кўзида қувонч. Биз, қувасойликлар, қайси соҳада бўлмасин, ютуқларга эришиб, Фарғона, мамлакат ривожига ўз ҳиссамизни қўшишга тайёرمىз.

Байрам ярмаркаси ҳам ташкил этилиб, унда шаҳардаги фермер хўжаликлари, кичик корхоналар қишлоқ хўжалиги, қандолатчилик маҳсулотлари билан иштирок этдилар.

Қувасойдаги йирик корхона ва ташкилотлар фахрийлари учун байрам дастурхони ёзилди. Ош танлови ҳам ўтказилиб, моҳир ошпазлар муносиб рағбатлантирилди.

Шу куни шаҳардаги имконияти чекланган инсонларга саховат кўрсатилди. Шаҳар ҳокимлиги, Ўзбекистон Ёшлар иттифоқи шаҳар Кенгаши ва фаол ёшлар иштирокида уларга ногиронлик аравачалари берилди.

ҚУВА

Кува тумани марказидаги Аҳмад ал-Фарғоний мажмуасида қуваликларнинг Наврўз байрами халқ сайли тарзида бўлиб ўтди.

Эрта тонгдан бошлаб янграган карнай-сурнай садолари халқ вакилларини байрамга чорлади. Катта йўлнинг бир томонига миллий дор тикилган бўлса, йўл бўйлаб тумандаги “Дехқон бозори” ва “Раста” буюм савдо комплекси жамиятлари, шунингдек, хусусий тадбиркорлар, ҳунармандлар томонидан ташкил этилган савдо ярмаркалари, таълим муассасалари ўқувчиларининг ижод намуналари акс этган кўргазмалар байрамга ўзгача шукуҳ бағишлади.

Асосий майдонда туман маданият ишлари бўлими, халқ таълими бўлимига қарашли мактаблар ҳамда касб-ҳунар коллежлари ҳамкорлигида тайёрланган “Марҳабо, Наврўзи олам!” деб номланувчи Байрам дастури намоиш этилди. байрам дастурида қувалик санъаткорлар билан бир қаторда пойтахтдан ташриф буюрган таниқли эстрада хонандаси “Ниҳол” мукофоти совриндори Шоира Отабекова, Ўзбекистон халқ ҳофизи Илҳом Иброҳимов, эл севган хонанда Баҳодир Мамажонов ва бошқалар иштирок этдилар ва халқимизга хуш кайфият улашдилар.

Кексалар дуога қўл очиб, юртимизга тинчлик, Юртбошимизга мустаҳкам соғлик, эл дастурхонига файзу барокотлар тиладилар.

2018-03-22 16:43:40